

Նշան Վանդակունի, Մարգար Վանեանց, Հայկ Վանատուր, Աւետիս Վանակն, Գարեգին Վանթրը, Սահակ Վանօ, Պօղոս Վանթէ, Պետրոս Վանթուզ, Վրոյր Վանթիլաթէոր, Աբրահամ Վանտրեց, Արշամ Վանումեանց, Սարգիս Վանողեան, Գուրգէն Վանթրըպլէօ, Վահրամ Վանթրիւփիւ, Նշան Վանթրիլոկ, Աւետիս Վանթրիւ, Վահան Վանթրույէ, Վարազդատ Վանտալ, Հայ Վանական:

Վանեցի գերդաստանի մը մէջ յաճախ մէկ հոգի դաշնակցական է, մէկ հոգի՝ ռամկավար, մէկ հոգի՝ հնչակեան, մէկ հոգի ալ՝ համայնավար: Դաշնակցականը կ'ըլլայ թթու, համայնավարը՝ կծու, հնչակեանը՝ կծկուած ու ռամկավարը՝ թթուած: Իսկ մէկ հոգի ալ անպատճառ չէզոք է՝ նոր կուսակցութիւն մը կազմուելու պարագային մէջը խոթելու համար իր ուժեղ քիթը:

Ամէն կուսակցութիւն տկարակազմ է առանց Վանեցիին: Այս պատճառով է, որ Խ. Հայաստանի մէջ կան բազմաթիւ համայնավար Վանեցիներ, արտասահմանի մէջ ալ՝ շատ Դաշնակցական Վանեցիներ: Ոմանք կ'ըսեն, թէ Վանեցին է, որ իր զօրութիւնը կ'առնէ կազմակերպութենէ: Մէկ բան բացարձակ է, որ Վանեցին ուժեղ ազգային մըն է, փոյթ չէ, թէ ուրկէ կը մատակարարէ իր ոյժը, աջէ՛ն, թէ ձախէն, վերէ՛ն, թէ վարէն, քաւարանէ՛ն, թէ դժոխքէն, ներսէ՛ն, թէ դուրսէն եւ կամ ամէն կողմէն:

Վանեցին ծնունդ տուած է երկու մեծ կազմակերպութիւններու. առաջին՝ արմենօ-հրեական միութեան, երկրորդ՝ արմենօ-հայկական եղբայրակցութեան:

Մինչ Սամսոնցիները կ'ուզէն հիմնել սամսոնականութիւնը, Կեսարացիները կ'ուզէն ստեղծել կեսարականութիւնը, Ակնցիները կ'ուզէն վերականգնել ակնընդականութիւնը եւ Տարօնցիները կը ճգնին առաջ բերել տարօնականութիւնը, Վանեցիները, ընդհակառակն, կ'ուզէն քանդել... վանականութիւնը:

Վանեցին որք հայութեան տուած է Հայրիկ մը: Հայութիւնը, սակայն, որք Վանեցիին մայրիկ մը չտալէ զատ, կնիկ մը տալն իսկ յաճախ շատ կը տեսնէ: